



Sumáriu Kazu
Tribunál Judisiál Primeira Instáncia Suai
Janeiru 2024

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Suai

1. Totál kazu ne'ebé JSMP monitoriza : 20*

| Artigu | Tipu Kazu | Númeru |
|---|--|-----------|
| Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD) | Ofensa ba integridade fízika simples ho natureza Violénsia Doméstika (VD) no tipu ilísitu sira kona-ba violénsia doméstika | 16 |
| Artigu 172 KP | Violasaun seksuál | 1 |
| Artigu 177 KP | Abuzu seksuál ba menór | 2 |
| Artigu 145 KP | Ofensa ba integridade fízika simples | 1 |
| Totál | | 20 |

2. Totál desizaun ne'ebé JSMP monitoriza:16

* Totál kazu 20 ne'e la reprezenta totál kazu ne'ebé Tribunál Judisiál Primeira Instáncia Suai julga iha fulan Janeiru 2024

| Tipu pena | Artigu | Númeru |
|--------------------------------------|--------------|-----------|
| Suspensaun ba prizaun nia ezekeusaun | Artigu 68 KP | 10 |
| Multa | Artigu 67 KP | 3 |
| Admoestasaun | Artigu 82 KP | 3 |
| Totál | | 16 |

3. Totál kazu sira ne'ebé adia tuir JSMP nia monitorizasaun: 0

4. Totál kazu sira ne'ebé kontinua prosesu tuir JSMP nia monitorizasaun: 4

B. Deskrisaun sumáriu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0003/23.MFMFI
 Kompozisaun Tribunál : Singulár
 Juis : Dr. Samuel da Costa Pacheco
 Prokuradór : Dr. Rafael Jerónimo Gusmão
 Defeza : Dr. Angelmo Pinto
 Desizaun : Pena prizaun fulan 3 suspende ba tinan 1

Iha 04 Janeiro 2024, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu MdA hasoru nia feen, iha Munisípiu Manufahi.

Akuzasaun Prokuradór

Prokuradór akuza katak iha 17 Jullu 2023, iha oras tuku 15:30 lokraik, arguidu tuku dala ida iha lezada nia tilun-hun parte karuk, tuku dala ida iha lezada nia ulun no buti dala ida lezada nia kakorok rezulta moras iha fatin sira ne'ebé hetan agresaun. Antes agresaun ne'e, arguidu ba hemu tua ho nia kolega sira, bainhira arguidu fila mai uma lezada dehan ba arguidu atu labele hemu tan tua ona, ho nune'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa totalmente ba faktu sira hotu iha akuzasaun no deklarata katak di'ak malu ona ho lezada no promete sei la kometa tan krime hanesan iha futuru.

Depoisde rona deklarasaun arguidu nian, prokurador husu ba tribunál atu presinde tiha deklarasaun hosi lezada ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedido ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun final

Prokurador konsidera arguidu provadu komete krime hasoru lezada, nune'e husu ba tribunál atu kondena arguidu ho pena multa.

Enkuantu defeza husu ba tribunál atu fó pena ne'ebé adekuaudu ba arguidu ho konsiderasaun katak arguidu konfesa integralmente ba faktu sira, di'ak malu ona ho lezada no arguidu mós promete sei la repete ninia hahalok ne'e iha futuru.

Desizaun

Depoisde avalia faktu sira ne'ebé prodús iha julgamentu, tribunál prova katak arguidu tuku dala ida iha lezada nia tilun-hun parte karuk, tuku dala ida iha lezada nia ulun no buti dala ida lezada nia kakorok rezulta moras iha fatin sira ne'ebé hetan agresan.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, di'ak malu ona ho lezada no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

2. Ofensa ba integridade física simples ho natureza violência doméstica

| | |
|----------------------|--|
| Nú. Prosesu | : 0064/23.BBMLV |
| Kompozisaun Tribunál | : Singulár |
| Juis | : Dr. Naason Mário A. M. Doutel |
| Prokurador | : Dr. Nelson J.S. Magno |
| Defeza | : Dr. Domingos dos Santos |
| Desizaun | : Pena prizaun fulan 6 suspende ba tinan 1 |

Iha 11 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade física simples ho natureza VD ne'ebé envolve arguidu MdJ hasoru nia feen, iha Munisípiu Bobonaro.

Akuzasaun Prokurador

Prokuradór akuza katak iha 16 Juñu 2023, iha oras tuku 23:00 kalan, arguidu tebe dala ida iha lezada nia kelen sorin parte loos no tebe dala ida iha lezada nia kanotak parte karuk rezulta moras iha kelen no bubu iha lezada nia kanotak. Antes agresaun ne'e, arguidu ho lezada diskute malu kona-ba fetu seluk nia mensajen ba arguidu ne'ebé lezada haree hetan.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarasaun katak arrepende ona ninia hahalok. Arguidu hatutan katak foin mai hatan iha tribunál no mós rekoñese katak baku feen ne'e ladi'ak, ho nune'e, arguidu promete iha futuru sei la repete tan hahalok hanesan hasoru lezada no ema seluk.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian ho konsiderasaun katak prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór haktuir katak arguidu provadu komete krime hasoru lezada, nune'e mezmu di'ak malu ona ho lezada maibé atu prevene krime VD ne'ebé a'as tebes, husu ba tribunál atu kondena arguidu ho pena prizaun maibé suspende nia ezekeusaun.

Enkuantu defeza haktuir katak arguidu konfesa, arrepende ninia hahalok no depoisde akontesimentu ne'e arguidu la halo tan krime hasoru lezada, nune'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kelen sorin parte loos no tebe dala ida iha lezada nia kanotak parte karuk rezulta moras ihs kelen no bubu iha kanotak.

Bazeia ba faktu provadu sira ne'e no tetu mós ho sirkunstánsia hotu-hotu, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

3. Krime ofensa ba integridade física simples ho natureza violénsia doméstika

Nú. Prosesu : 0050/23.BBMLV

Kompozisaun Tribunál : Singulár
Juis : Dr. Naason Mário A. M. Doutel
Prokuradór : Dr. Nelson J.S. Magno
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 11 Janeiro 2024, Tribunál Judisiál Primeira Instáncia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu SL hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 22 Maiu 2023, iha oras tuku 09:00 dadeer, arguidu ho lezada diskute malu kona-ba arguidu joga hotu tiha osan, nune'e arguidu tuku dala tolu iha lezada nia ulun, basa dala ida iha lezada nia hasan parte karuk no buti lezada nia kakorok rezulta kanek.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Iha julgamentu, arguidu konfesa faktu sira ne'ebé hakerek iha akuzasaun no deklarara katak arrepende ninia hahalok. Arguidu mós hatutan katak foin primeiravés halo krime hasoru lezada no mai hatan iha tribunál.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian ho konsiderasaun katak prova suficiente ona. Relasiona ho pedidu ne'e, defeza laiha opozisaun. Ho nune'e, tribunál presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór konsidera konfisaun arguidu nian nune'e provadu faktu sira ne'ebé arguidu komete hasoru lezada. Prokuradór mós argumenta katak krime VD a'as tebes, nune'e husu ba tribunál atu kondena arguidu ho pena prizaun maibé suspende ninia ezekeusaun.

Entretantu defeza husu ba tribunál atu kondena arguidu ho pena multa ho konsiderasaun katak arguidu konfesa, arrepende ninia hahalok no foin primeiravés komete krime hasoru lezada no mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala tolu iha lezada nia ulun, basa dala ida iha lezada nia hasan parte karuk no buti lezada nia kakorok rezulta kanek.

Bazeia ba faktu provadu sira ne'e no tetu mós ho sirkunstánsia hotu-hotu, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

4. Krime ofensa ba integridade fízika simples

Nú. Prosesu : 0117/22.PDSUA
Kompozisaun Tribunál : Singulár
Juis : Dr. Naason Mário A. M. Doutel
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 12 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ne'ebé envolve arguida RVM no arguida AVH hasoru lezada MN, iha Munisípiu Bobonaro.

Akuzasaun Prokuradór

Prokuradór akuza katak iha 20 Agostu 2022, maizumenus iha oras tuku 19:30 kalan, arguida lori ai-sanak ida baku dala ida iha lezada nia hasan parte karuk no baku dala rua iha lezada nia hasan parte loos.

Tuir mai, iha 24 Agostu 2022, maizumenus iha oras tuku 16:30 lokraik, arguida lori tan ai-sanak baku dala ida iha lezada nia hasan parte loos, kontinua atu baku tan lezada, maibé la konsege kona lezada tanba lezada satan netik ho liman.

Antes agresaun hirak ne'e, arguida ho lezada diskute malu iha momentu família sira rezolve hela problema ne'ebé akontese entre arguida RVM nia oan mane ne'ebé diskonfia halo violasaun seksuál hasoru lezada no kazu ne'e sei prosesu hela, ho nune'e mosu agresaun ne'e.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguida konfesa faktu hotu iha akuzasaun no deklara katak arrepende ninia hahalok no promete sei la repete hahalok ne'e iha futuru.

Alende ne'e, lezada kontinua konfirma faktu hotu iha akuzasaun no deklarara katak arguida nia aktu ne'e rezulta lezada sofre moras iha hasan parte loos no liu tiha lora ida mak lezada foin sente di'ak.

Alegasaun finál

Prokuradór haktuir katak arguida nia aktu ne'e prenze elementu hosi krime ne'ebé prokuradór akuza ba arguida, nune'e atu halo prevensaun ba krime refere, husu ba tribunál atu kondena arguida ho pena prizaun maibé suspende ninia ezekusaun.

Entretantu defeza haktuir katak iha julgamentu arguida konfesa faktu hotu iha akuzasaun, arrepende ninia hahalok no promete sei la repete hahalok ne'e iha futuro, nune'e husu ba tribunál atu aplika pena ne'ebé kmaan ba arguida.

Desizaun

Depoisde avalia faktu sira hotu, tribunál prova katak arguida lori ai-sanak ida baku dala ida iha lezada nia hasan parte karuk no baku dala rua iha lezada nia hasan parte loos. Tribunál mós prova katak liu tiha lora haat, arguidu kontinua uza ai-sanak baku dala ida iha lezada nia hasan parte loos.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguida konfesa, arrepende ninia hahalok no promete sei repete hahalok ne'e iha future, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

5. Krime ofensa ba integridade física simples ho natureza violência doméstica

| | |
|----------------------|---------------------------------|
| Nú. Prosesu | : 0018/22.BBCLC |
| Kompozisaun Tribunál | : Singulár |
| Juis | : Dr. Naason Mário A. M. Doutel |
| Prokuradór | : Dr. Nelson J. S. Magno |
| Defeza | : Dr. Domingos dos Santos |
| Desizaun | : Pena multa US\$60.00 |

Iha 12 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Babonaro, prezide leitura sentensa ba krime ofensa ba integridade física simples ho natureza VD ne'ebé envolve arguidu DM hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 30 Dezembru 2022, maizumenus iha oras tuku 18:30 lokraik, arguidu foti lampra no tuda kona iha lezada nia ulun parte kotuk. Antes

agresaun ne'e, arguidu haruka sira nia oan mane foti osan US\$5.00 iha lezada nia karteira tanba ne'e lezada hirus sira nia oan, nune'e arguidu ho lezada diskute malu no mosu agresaun ne'e.

Prokurdadór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, foin primeiravés mai hatan iha tribunál no promete katak sei la repete ninia hahalok ne'e iha futuru hasoru lezada no ema seluk.

Hanesan kazu sira iha leten, depoisde rona deklarasaun hosi arguidu, prokuradór husu ba tribunál atu presinde tiha deklarasaun hosi lezada ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór haktuir katak arguidu nia aktu ne'e prenze elementu hosi krime ne'ebé prokuradór akuza ba arguidu no haree mós krime ofensa ba integridade física simples ho natureza VD ne'ebé aas tebes, nune'e husu ba tribunál atu kondena arguidu ho pena prizaun maibé suspende ninia ezekusaun.

Entretantu defeza haktuir katak arguidu konfesa, arrepende ninia hahalok, foin primeiravés mai hatan iha tribunál no promete ona katak sei la repete ninia hahalok ne'e iha futuru hasoru lezada no ema seluk, nune'e husu ba tribunál atu kondena arguidu ho pena admoestasaun.

Desizaun

Depoisde avalia faktu sira hotu, tribunál prova katak arguidu foti lampra no tuda kona iha lezada nia ulun parte kotuk.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$60.00 ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

6. Krime ofensa ba integridade física simples ho natureza violénsia doméstika

Nú. Prosesu : 0018/20.BBBV
Kompozisaun Tribunál : Singulár
Juis : Dr. Samuel da Costa Pacheco

Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 8 suspende ba tinan 1

Iha 12 Janeiro 2024, Tribunál Judisiál Primeira Instáncia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AFP hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 07 Outubru 2020, iha oras tuku 22:00 kalan, arguidu tuku dala ida iha lezada niaibun rezulta kanek no bubu. Antes agresau ne'e, arguidu foin fila hosi halo uma-lulik no haree hetan malus mean iha sira nia veranda, nune'e arguidu husu ba lezada dehan "*se mak tafui malus mean iha veranda?*". Lezada hatan katak bin mak mama malus no tafui iha ne'e. Rona nune'e arguidu hirus, nune'e lezada kous sira nia oan ba tiha iha banin nia uma. Bainhira lezada fila mai fali sira nia uma, arguidu komete aktu ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós deklara foin primeiravés komete krime no hatan iha tribunál. Arguidu promete iha futuru sei la repete ninia hahalok ne'e hasoru lezada no ema seluk tanba konsidera baku feen ne'e ladi'ak.

Depoisde rona deklarasaun hosi arguidu, prokuradór husu ba tribunál atu presinde tiha deklarasaun hosi lezada ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór haktuir katak arguidu konfesa faktu sira, ho nune'e mezmusira di'ak malu ona maibé atu prevene krime hanesan akontese tan iha futuru, husu ba tribunál atu kondena arguidu ho pena prizaun maibé suspende ninia ezekeusaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende ninia hahalok, foin primeiravés mai

hatan iha tribunál, rekoñese baku feen nu'udar hahalok la'diak no promete iha futuru sei la komete tan krime hanesan hasoru lezada no ema seluk.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ibun rezulta kanek no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál, rekoñese baku feen ne'e hahalok ladi'ak no promete iha futuru sei halo komete tan krime hanesan hasoru lezada no ema seluk, nune'e tribunál konklui prosesu ne'e no kondena arguidu ho pena prizaun fulan ualu suspende ba tinan ida.

7. Krime ofensa ba integridade fízika simples ho natureza violénsia doméstika

Nú. Prosesu : 0068/23.BBBGD
KompozisaunTribunál : Singulár
Juis : Dr. Samuel da Costa Pacheco
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 12 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu JXJ hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 08 Maiu 2023, iha oras tuku 01:00 madrugada, arguidu tuku dala ida iha lezada nia matan parte karuk, tuku dala ida iha lezada nia matan parte loos no buti lezada nia kakorok. Hafoin, arguidu kontinua tuku tan dala ida iha lezada nia matan fukun parte karuk, tuku dala ida iha lezada nia ulun, tebe dala ida iha lezada nia kelen parte karuk no kaer lezada nia liman dulas ba kotuk. Arguidu mós tuku dala barak iha lezada nia kotuk laran. Antes agresaun ne'e, lezada haruka arguidu atu liga CCTV, maibé arguidu lakohi tanba matan dukur no kondisaun lanu hela, nune'e sira diskute malu no mosu agresaun ne'e.

Prokurdadór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, rekoñese baku feen nu'udar hahalok ladi'ak, foin primeiravés mai hatan iha tribunál no promete sei la repete aktu ne'e iha futuru.

Nune'e mós ho kazu ida ne'e, depoisde rona deklarasaun hosi arguidu, prokuradór husu ba tribunál atu presinde tiha deklarasaun hosi lezada ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór haktuir katak arguidu provadu komete aktu ne'ebé konsta iha akuzasaun hasoru lezada, ho nune'e atu prevene krime ne'e la akontese tan iha futuru, husu tribunál atu kondena arguidu ho pena prizaun maibé suspende nia ezekusaun.

Entretantu defeza haktuir katak iha julgamentu arguidu konfesa faktu hotu iha akuzasaun, arrepende ninia hahalok, rekoñese baku feen nu'udar hahalok ladi'ak, foin primeiravés mai hatan iha tribunál no promete sei la repete aktu ne'e iha futuru, nune'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia matan parte karuk, tuku dala ida iha lezada nia matan parte loos, buti lezada nia kakorok, tuku tan dala ida iha lezada nia matan fukun parte karuk, tuku dala ida iha lezada nia ulun, tebe dala ida iha lezada nia kelen parte karuk no kaer lezada nia liman dulas ba kotuk. Tribunál mós prova katak arguidu tuku dala barak iha lezada nia kotuk laran.

Bazeia ba faktu provadu hirak ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

8. Krime ofensa ba integridade fízika simples ho natureza violénsia doméstika

| | |
|----------------------|--|
| Nú. Prosesu | : 0003/20.BBBBV |
| Kompozisaun Tribunál | : Koletivu |
| Juis | : Dr. Naason Mário A. M. Doutel, Dr. Samuel da Costa Pacheco no Dr. Hugo da Cruz Pui |
| Prokuradór | : Dr. Nelson J. S. Magno |
| Defeza | : Dr. Domingos dos Santos |
| Desizaun | : Pena prizaun fulan 8 suspende ba tinan 1 |

Iha 12 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura akordaun ba krime maus-tratus ba kónjuje ne'ebé envolve arguidu ARMO hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 07 Outubru 2019, arguidu tebe dala rua iha lezada nia hirus-matan, tebe dala rua iha lezada nia kotuk laran, hafoin kaer lezada nia liman hodi rasta ba semente leten no kontinua buti lezada nia kakorok. Antes agresau ne'e, arguidu ho lezada diskute malu kona-ba lezada simu telefone husi fetu ida ne'ebé lezada rasik la koñese no bainhira lezada husu katak "*ne'e hau ko'alia ho sé?*". Fetu deskoñesidu ne'e direktamente tolok no trata lezada, nune'e lezada baku rahun tiha arguidu nia telefone no mosu agresau ne'e.

Tuir mai 01 Janeiro 2020, arguidu kaer lezada nia liman no rasta tama ba uma laran. Hafoin arguidu haruka lezada tuur iha kadeira no arguidu tebe dala rua iha lezada nia hirus-matan halo lezada monu tun ba rai. Antes agresau ne'e, arguidu ho lezada diskute malu kona-ba lezada deskonfia arguidu iha relasaun domin ho fetu seluk.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu nega faktu hotu iha akuzasaun no deklarata katak desde sira moris hamutuk hanesan feen no la'en arguidu nunca baku lezada, maibé lezada maka sempre ko'alia kona-ba lezada nia folin, nune'e aktu sira ne'e lezada inventa de'it. Arguidu hatutan katak depoisde akontesimentu ne'e sira moris separadu ona.

Enkuantu lezada kontinua konfirma faktu hotu iha akuzasaun no hatutan mós katak depoisde akontesimentu ne'e lezada deside atu moris separadu ho arguidu.

Alegasaun finál

Prokuradór haktuir katak mezmú arguidu koko atu nega faktu hotu iha akuzasaun maibé lezada nafatin konfirma faktu sira iha akuzasaun, nune'e tribunál konsidera arguidu provadu komete krime hasoru lezada, tanba ne'e husu ba tribunál atu kondena arguidu ho pena prizaun maibé suspende nia ezekusaun.

Entretantu defeza haktuir katak iha prosesu julgamentu arguidu deklarata katak la komete aktu ne'ebé akuza ba arguidu, mezmú nune'e lezada konfirma ho akuzasaun, tanba ne'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu hotu sira hotu, tribunál prova katak arguidu tebe dala rua iha lezada nia hirus-matan, tebe dala rua iha lezada nia kotuk laran, hafoin kaer lezada nia

liman hodi rasta ba semente leten no kontinua buti lezada nia kakorok. Tribunál mós prova katak arguidu kaer lezada nia liman no rasta tama ba uma laran no haruka lezada tuur iha kadeira hafoin arguidu tebe dala rua iha lezada nia hirus-matan halo lezada monu tun ba rai.

Bazeia ba faktu provadu hirak ne'e tribunál halo alterasaun ba kualifikasaun jurídiku hosi artigu 154 KP kona-ba maus-tratus ba kónjuje ba fali artigu 145 KP kona-ba ofensa ba integridade fízika simples, tanba tribunál konsidera krime ne'e la prenze elementu hosi krime maus-tratus ba kónjuje. Relasiona ho alterasaun ne'e, prokuradór laiha opozisaun, nune'e tribunál depoisde tetu sirkunstánsia hot-hotu ne'ebé haleu krime ne'e, konklui prosesu ne'e no kondena arguidu ho pena prizaun fulan ualu suspende ba tinan ida.

9. Krime ofensa ba integridade fízika simples ho natureza violénsia doméstika

Nú. Prosesu : 0018/23.BBATB
Kompozisaun Tribunál : Singulár
Juís : Dr. Hugo da Cruz Pui
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena admoestasaun

Iha 19 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu EF hasoru nia alin mane, iha Munisípiu Bobonaro.

Akuzasaun Prokuradór

Prokuradór akuza katak iha 31 Maiu 2023, iha oras tuku 17:00 lokraik, arguidu foti ai-bebak ida no baku dala ida iha lezadu nia liman-sikun parte loos rezulta moras no bubu. Antes agresaun ne'e, arguidu haruka lezadu atu ba haree karau, maibé lezadu la ba no halimar fali iha viziñu nia uma, nune'e arguidu komete aktu refere hasoru lezadu.

Prokuradór akuza arguidu kontra artigu 145 KP kona-ba ofensa ba integridade fízika simples ho natureza VD ho moldura penál to'o tinan 3 ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu hatutan katak foin primeiravés mai hatan iha tribunál no promete sei la repete hahalok ne'e iha futuro.

Depoisde rona deklarasaun hosi arguidu, prokuradór husu ba tribunál atu presinde tiha deklarasaun hosi lezadu ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezadu nia deklarasaun ka la rona ona lezadu nia deklarasaun.

Alegasaun final

Prokuradór haktuir katak kazu VD aas tebes nune'e atu halo prevensaun ba krime refere, husu ba tribunál atu aplika pena tuir artigu 145 KP ba arguidu.

Entretantu defeza husu ba tribunál atu kondena arguidu ho pena ne'ebé adekua ho konsiderasaun katak arguidu konfesa, arrepende ninia hahalok no promete sei la repete hahalok ne'e iha futuro.

Desizaun

Depoisde avalia faktu hotu, tribunál prova katak arguidu foti ai-bebak ida no baku dala ida iha lezadu nia liman-sikun parte loos rezulta moras no bubu.

Bazeia ba faktu provadu hirak ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no promete sei la repete hahalok ne'e iha futuro, nune'e tribunál konklui prosesu ne'e no kondena arguidu ho pena adomestasaun.

10. Krime ofensa ba integridade física simples ho natureza violência doméstica

| | |
|----------------------|--|
| Nú. Prosesu | : 0142/22.BBMLV |
| Kompozisaun Tribunál | : Singulár |
| Juis | : Dr. Hugo da Cruz Pui |
| Prokuradór | : Dr. Nelson J. S. Magno |
| Defeza | : Dr. Domingos dos Santos |
| Desizaun | : Pena prizaun fulan 6 suspende ba tinan 1 |

Iha 19 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade física simples ho natureza VD ne'ebé envolve arguidu RV hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 02 Dezembro 2022, iha oras tuku 20:20 kalan, arguidu tuku dala ida iha lezada niaibun, tuku dala rua iha lezada nia kanuruk no rakut lezada nia fuuk. Bainhira lezada halai sai ba liur arguidu duni tuir no tuku tan dala rua iha lezada

nia ibun rezulta kanek no bubu. Antes agresaun ne'e, arguidu ho lezada diskute malu kona-ba arguidu hateten ba lezada katak nia atu ba hader ai-funan, maibé lezada hatan ba arguidu dehan "*atu ba hader ai-funan ka atu ba hemu tua?*", ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho natureza VD ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarasaun katak arrepende ninia hahalok. Arguidu hatutan mós katak depoisde akontesimentu arguidu husu deskulpa ba lezada, la komete tan krime seluk hasoru lezada no foin primeiravés mai hatan iha tribunál.

Depoisde rona tiha deklarasaun arguidu nian, prokuradór husu ba tribunál atu presinde lezada nia deklarasaun tanba prova suficiente ona. Defeza konkorda ho pedidu ne'e. Ho nune'e, tribunál mós presinde tiha deklarasaun lezada nian ka la rona ona lezada nia deklarasaun.

Alegasaun finál

Prokuradór haktuir katak arguidu nia aktu ne'e prenze elementu hosi krime ne'ebé prokuradór akuza ba arguidu. Haree mós krime ofensa ba integridade fízika simples ho natureza VD aas tebes, nune'e atu halo prevensaun ba krime refere, husu ba tribunál atu kondena arguidu tuir artigu 145 KP.

Entretantu defeza husu ba tribunál atu aplika pena multa ba arguidu tuir kapasidade ekonomia arguidu nian.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ibun, tuku dala rua iha lezada nia kanuruk, rakut lezada nia fuuk, tuku tan dala rua iha lezada nia ibun rezulta kanek no bubu.

Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, tribunál konklui prosesu no kondena arguidu ho pena prizaun fulan neen suspende ba tinan ida.

11. Krime ofensa ba integridade fízika simples ho natureza violénsia doméstika

Nú. Prosesu : 0129/21.BBMLV

Kompozisaun Tribunál : Singulár

Juis : Dr. Hugo da Cruz Pui
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 19 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AdF hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 12 Dezembru 2021, iha oras tuku 10:00 dadeer, arguidu tuku dala ida iha lezada nia ibun, tuku dala ida iha lezada nia ulun parte kotuk, kaer lezada nia ulun riba ba rai halo lezada nia kidan kona iha fatuk rezulta moras maka'as. Arguidu mós tata lezada nia liman sanak rezulta kanek. Antes agresaun ne'e, arguidu deskonfia lezada amante (*selingkuh*) ho mane seluk momentu lezada ba haree nia alin partu. Ho nune'e, sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho natureza VD ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu hatutan katak foin primeiravés mai hatan iha tribunál, rekoñese katak baku feen ne'e ladi'ak no promete iha futuro sei la baku tan lezada.

Depoisde rona tiha deklarasaun arguidu nian, prokuradór husu ba tribunál atu presinde lezada nia deklarasaun tanba prova suficiente ona no parte defeza mós konkorda ho pedidu ne'e. Ho nune'e, tribunál mós presinde tiha deklarasaun lezada nian ka la rona ona lezada nia deklarasaun.

Alegasaun finál

Prokuradór haktuir katak arguidu provadu komete aktu ne'ebé konsta iha akuzasaun hasoru lezada, ho nune'e atu prevene krime ne'e la akontese tan iha futuro, husu ba tribunál atu kondena arguidu ho pena prizaun maibé suspende nia ezeusaun.

Entretantu defeza haktuir katak iha julgamentu arguidu konfesa faktu hotu iha akuzasaun, arrepende ninia hahalok, rekoñese katak baku feen ne'e nu'udar hahalok ladi'ak, foin primeiravés mai hatan iha tribunál no promete sei la repete aktu ne'e iha futuro, nune'e husu ba tribunál atu aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ibun, tuku dala ida iha lezada nia ulun parte kotuk, kaer lezada nia ulun no riba ba rai halo lezada nia kidan kona iha fatuk rezulta moras maka'as. Tribunál mós prova katak arguidu tata lezada nia liman sanak rezulta kanek.

Bazeia ba faktu provadu hirak ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

12. Krime ofensa ba integridade fízika simples ho natureza violénsia doméstika

Nú. Prosesu : 0018/23.BBBLB
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena multa US\$60.00

Iha 19 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu EdM hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 30 Juñu 2023, iha oras tuku 03:00 madrugada, arguidu tuku dala rua iha lezada nia kabaas no buti dala ida iha lezada nia kakorok. Antes agresaun ne'e, aguidu ho lezada diskute malu kona-ba arguidu tama uma madrugada.

Prokuradór akuza arguidu kontra artigu 145 KP kona-ba ofensa ba integridade fízika simples ho natureza VD ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun katak buti kakorok dala ida no tuku duni lezada nia kabaas maibé dala ida de'it la'os dala rua. Arguidu hatutan katak arrepende ninia hahalok ne'e, foin primeiravés mai hatan iha tribunál no promete iha futuro sei la komete tan krime hasoru lezada no ema seluk. Arguidu mós hatutan tan katak depoisde akontesimentu ne'e sira moris separadu ona.

Enkuantu lezada nafatin konfirma faktu hotu iha akuzasaun no deklarata katak depoisde akontesimentu ne'e sira moris separadu ona no to'o agora arguidu la tau-matan ba oan sira.

Alegasaun final

Prokurador konsidera faktu hotu provadu, mezmu arguidu konfesa parsialmente ba faktu iha akuzasaun maibe lezada konfirma faktu hotu, tanba ne'e husu ba tribunál atu kondena arguidu ho pena prizaun maibe suspende ninia ezekusaun.

Entretantu defeza haktuir katak arguidu deklarata de'it faktu ne'ebé nia komete, arrepende ninia hahalok, foin primeiraves mai hatan iha tribunál no promete iha futuru sei la komete tan krime hasoru lezada no ema seluk, nune'e husu ba tribunál atu kondena arguidu ho pena admoestasaun.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia kabaas no buti dala ida iha lezada nia kakorok.

Bazeia ba faktu provadu sira ne'e no tetu mos sirkunstansia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé kada lora arguidu sei selu US\$1.00 durante lora 60. Tribunál mos fiksa pena alternativa durante lora 40 prizaun, bainhira arguidu la kumpri pena multa refere.

13. Krime ofensa ba integridade física simples ho natureza violência doméstica

Nú. Prosesu : 0039/23.BBMLV
Kompozisaun Tribunál : Singulár
Juis : Dr. Hugo da Cruz Pui
Prokurador : Dr. Nelson J. S. Magno
Defeza : Dr. Domingos dos Santos
Desizaun : Pena admoestasaun

Iha 19 Janeiro 2024, Tribunál Judisiál Primeira Instáncia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade física simples ho natureza VD ne'ebé envolve arguidu SG hasoru nia feen, iha Munisípiu Bobonaro.

Akuzasaun Prokurador

Prokurador akuza katak iha 21 Abril 2023, iha oras tuku 08:20 dadeer, arguidu tuku dala ida iha lezada nia reen-toos no tuku dala ida iha lezada nia kabun. Antes ne'e,

arguidu husu osan iha lezada maibé lezada la fó, ho nune'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho natureza VD ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok ne'e. Arguidu hatutan katak depoisde akontesimentu ne'e sira di'ak malu fali no foin primeiravés mai hatan iha tribunál.

Depoisde rona tiha deklarasaun arguidu nian, prokuradór husu ba tribunál atu presinde lezada nia deklarasaun tanba prova suficiente ona no defeza mós konkorda ho pedidu ne'e. Ho nune'e, tribunál decide presinde tiha deklarasaun lezada nian ka la rona ona lezada nia deklarasaun.

Alegasaun finál

Prokuradór haktuir katak arguidu nia aktu ne'e prenze elementu krime ofensa ba integridade fizika simples ho natureza VD. Alende ne'e, haree mós ba kazu VD ne'ebé aas tebes, nune'e atu halo prevensaun ba krime refere, husu tribunál atu aplika pena tuir artigu 145 ba arguidu.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende ninia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia reen-toos no tuku dala ida iha lezada nia kabun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

14. Krime ofensa ba integridade fízika simples ho natureza violénsia doméstika

| | |
|----------------------|---------------------------|
| Nú. Prosesu | : 0040/22.BBBGD |
| Kompozisaun Tribunál | : Singulár |
| Juis | : Dr. Hugo da Cruz Pui |
| Prokuradór | : Dr. Nelson J. S. Magno |
| Defeza | : Dr. Domingos dos Santos |

Desizaun : Pena multa US\$60.00

Iha 19 Janeiro 2024, Tribunál Judisiál Primeira Instáncia Suai liuhosi julgamentu móvel iha Munisípiu Bobonaro, prezide leitura sentensa ba krime ofensa ba integridade física simples ho natureza VD ne'ebé envolve arguidu JS hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 25 Dezembru 2022, iha oras tuku 12:20, meiodia, arguidu tuku dala ida iha lezada nia tilun-hun parte karuk no lori ai-pedasuk ida baku dala ida iha lezada nia kidan parte karuk rezulta lezada oin nakukun no monu ba rai. Antes agresaun ne'e, arguidu ho lezada diskute malu kona-ba mane foun ne'ebé ba iha sira nia uma iha loron no la fó boas festa maibé depoisde mai fali iha madrugada mak foin fó boas festa ba lezada. Ho nune'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho natureza VD ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu hatutan katak foin primeiravés mai hatan iha tribunál no promete sei la baku tan lezada iha futuro. Arguidu aumenta tan katak agresaun ne'e mosu tanba arguidu deskonfia lezada iha relasaun domin ho sira nia mane foun.

Depoisde rona tiha deklarasaun arguidu nian, prokuradór husu ba tribunál atu presinde lezada nia deklarasaun tanba prova sira suficiente ona no defeza mós konkorda ho pedidu ne'e. Ho nune'e, tribunál mós presinde tiha deklarasaun lezada nian ka la rona ona lezada nia deklarasaun.

Alegasaun finál

Prokuradór haktuir katak arguidu provadu komete krime hasoru lezada no mezmu sira di'ak malu ona maibé haree ba krime VD ne'ebé aas tebes nune'e atu halo prevensaun ba krime refere, husu ba tribunál atu aplika pena ba arguidu tuir artigu 145 KP.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia tilun-hun parte karuk no ho ai-pedasuk ida baku dala ida iha lezada nia kidan parte karuk, rezulta lezada oin nakukun no monu ba rai.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00, ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40 prizaun, bainhira arguidu la selu pena multa refere.

15. Krime ofensa ba integridade fízikasimples ho natureza violénsia doméstika

Nú. Prosesu : 0004/23.BBCLCs
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 9 suspende ba tinan 1

Iha 19 Janeiro 2024, Tribunál Judisiál Primeira Instánsia Suai liuhosi julgamentu móvel iha Munisípiu Bobonaro, prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu RA hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 02 Marsu 2023, iha oras tuku 16:30 lokraik, arguidu lori kadeira masa ida baku dala ida iha lezada nia ulun rezulta kanek no raan sai. Hafoin ne'e, arguidu foti ai-naton ida no baku dala ida iha lezada nia kotuk laran rezulta moras no bubu. Antes agresaun ne'e, argudu haruka lezada ba lia mate maibé lezada la ba, ho nune'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun no deklara katak arrepende ninia hahalok. Arguidu hatutan katak foin primeiravés mai hatan iha tribunál no rekoñese katak baku feen ne'e ladi'ak. Arguidu mós promete sei la komete tan krime hanesan iha futuru.

Hanesan kazu sira iha leten, iha kazu ida ne'e, depoisde rona deklarasaun hosi arguidu, prokuradór husu ba tribunál atu presinde tiha deklarasaun hosi lezada ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun. Ho nune'e, tribunál mós presinde tiha lezada nia deklarasaun ka la rona ona lezada nia deklarasaun.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian. Tanba ne'e, husu ba tribunál atu aplika pena ne'ebé hakerek ona iha artigu 145 KP.

Entretantu defeza haktuir katak arguidu konfesa faktu hotu iha akuzasaun, arrepende ninia hahalok no foin mak mai hatan iha tribunál, tanba ne'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu lori kadeira masa ida no baku dala ida iha lezada nia ulun rezulta kanek raan sai no prova mós katak arguidu uza ai-naton ida no baku dala ida iha lezada nia kotuk laran rezulta moras no bubu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok, foin primeiravés mai hatan iha tribunál, konsidera katak baku feen ne'e nu'udar hahalok ladi'ak no mós promete sei la komete tan krime hanesan iha futuro, nune'e tribunál konklui prosesu no kondena arguidu ho pena prizaun fulan sia suspende ba tinan ida.

16. Krime ofensa ba integridade física simples ho natureza violéncia doméstika

Nú. Prosesu : 0013/22.CVMCT
Kompozisaun Tribunál : Singulár
Juís : Dr. Hugo da Cruz Pui
Prokuradór : Dr. Rafael Jerónimo Gusmão
Defeza : Dr. Domingos dos Santos
Desizaun : Pena admoestasaun

Iha 30 Janeiro 2024, Tribunál Judisiál Primeira Instánsia Suai, prezide leitura sentensa ba krime ofensa ba integridade física simples ho natureza VD ne'ebé envolve arguidu ISBC hasoru nia eis feen, iha Munisípiu Covalima.

Akuzasaun Prokuradór

Prokuradór akuza katak iha 02 Setembru 2023, iha oras tuku 18:00 lokraik, lezada ba iha arguidu nia uma no husu sira nia oan nia dokumentu sertidaun batismu no sertidaun kazamentu arguidu ho lezada nian, maibé arguidu dehan ba lezada katak dokumentu sira ne'e lakon hotu ona. Rona ida ne'e, halo lezada diskute malu ho arguidu no lezada dada arguidu nia pasta talin to'o kotu. Ho nune'e, arguidu lori pasta talin refere baku dala ida iha lezada nia liman kabun parte karuk rezulta moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no aumenta tan katak momentu arguidu ko'alia ba lezada katak dokumentu sira lakon hotu ona, lezada rakut arguidu nia oin to'o kanek no tanba lakohi problema, arguidu hases aan no sai tiha ba liur, maibé lezada la'o tuir arguidu no dada arguidu nia pasta talin to'o kotu. Ho nune'e mak arguidu lori pasta talin ne'e baku dala ida iha lezada nia liman kabun parte karuk.

Enkuantu lezada nafatin konfirma faktu sira iha akuzasaun.

Alegasaun finál

Prokuradór haktuir katak arguidu provadu komete aktu ne'ebé konsta iha akuzasaun hasoru lezada, ho nune'e atu prevene krime ne'e iha futuro, husu ba tribunál atu kondena arguidu ho pena prizaun maibé suspende nia ezekusaun.

Entretantu defeza haktuir katak bazeia deklarasaun arguidu nian lezada mak komete uluk krime hasoru arguidu, nune'e arguidu lori pasta talin baku lezada, tanba ne'e husu ba tribunál atu kondena arguidu ho pena multa.

Desizaun

Depoisde avalia faktu hotu, tribunál prova katak arguidu lori pasta talin baku dala ida iha lezada nia liman kabun parte karuk rezulta moras. Bazeia ba faktu provadu hirak ne'e no tetu mós ho sirkunstánsia hot-hotu ne'ebé haleu krime ne'e, tribunál konklui prosesu ne'e no kondena arguidu ho pena admoestasaun.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>